

La baselgia oz en Frantscha

Ina sociologa descriva ed analysescha

DA GUIU SOBIELA-CAANITZ

■ **Co vai vinavant cun il cristianissem en l'Europa bainstanta? Da lezza dumonda areguard la Frantscha s'occupa Danièle Hervieu-Léger, manadra da l'Institut interdisciplinar per la perscrutaziun da fatgs religius en la Sco-la auta da ciencias socialas (Paris).** Ses davos essai* sa restrenscha al catolicissem, anc adina la confessiun principala en Frantscha, avant l'islam e lunsch avant in protestantissem franzos limità a Paris e paucs intschess a l'ur. L'autura ha fatg retschertgas aifer pravendas catolicas da Paris. Il volum na cuntogna betg lungas glistas da cifras, sco ch'igl è savens il cas en ovras sociologicas, mabain rapporta ed interpretescha fatgs e trends. Mintgatant ston ins leger pliras giadas ina frasa scritta en il patuà dals spezialists, ma tgi che sa dat lezza fadia survegn lura sco paja ina chapientscha pli profunda dals connex variads tranter baselgia e societad. Qua lessa be resumar quellas conclusiuns che pudessan interessar in lectur grischun, pia d'in chantun paritetico che n'enconuscha betg il laicissem extrem da la societad franzosa.

La cardientscha sco purschida

Gia l'introducciun dat il tun. L'autura citescha la «Brev als catolics da Frantscha» publicada 1996 dals uestgts franzos. La titulaziun è significativa: «Catolics da Frantscha» empè da «catolics franzos» che savurass da nazionalissem, tirond endament in cantic dal 19avel tschientaner che proclamava: «Catolics e Franzos adina!». La brev sa

drizza pia er als immigrads catolics. Ils uestgts punctueschan: «Senza targlinar stainsa sco catolics en il context cultural ed instituziunal d'oz, cunzunt cun ils progress da l'individualissem ed il princip da secularitad. Nus refusain mintga sort brama per quels temps passads nua che l'autoritad pareva da dominar en moda incontestada (...). En la societad d'oz lainsa duvrar la vigur da la purschida e dal dom da l'evangeli» (cità p. 17). Anc pli significativ è il titel da la brev: «Proponer la cardientscha en la societad d'oz» (p. 17, n. 1).

La vita religiosa sco pelegrinadi

Co reagescha la societad franzosa a la cardientscha purschida en las diocesas e cunzunt las citads dal pajais? L'autura rapporta: «Ils lieus instituziunals administrads da la Baselia catolica na vegnan pli frequentads, ils bajetgs èn vids, ma la cuminanza catolica viva en Frantscha en in mantun da gruppettas e raits colliadas, a moda pli u main lucca, cun structures sco moviments religius, 'pravendas novas' che federeschan iniziatives, ONG cristianas, centers da devoziun en connex cun lieus da pelegrinadi (...). En tut lezzas gruppas s'engaschan administraturals laics, cun u senza paja» (p. 276). Quai numna l'autura «ina religiusadad pelegrina» (p. 278): «Il success da las radunanzas en massa crescha, cunzunt tar ils giuvens, sco er il svilup d'ina camaradaria per lieus e moments solens' che renovescha e stgaffescha puspè las isanzas dals pelegrinadis d'antruras. Tut quai pussibilitatescha da descriver ina vaira camaradaria pelegrina (...) che po sa palesar en accziuns extra-

ordinarias, cunzunt pelegrinadis, (...) schizunt quels che las isanzas han stabilisà gia daditg» (pp. 278–280). Qua dovra l'autura trais designaziuns regiunalas da pelegrinadis tradiziunals, numnadain «pardons» (Bretagna), «ostensions» (Limousin en Frantscha centrala) e «rapports» (Argonne, collinas tranter la Lorena e Champagne); quels vegls numns valan bain per radunanzas religiusas tradiziunals che van enavos enfin il 17avel tschientaner (cunterrefurma). «Tuttas diocesas organiseschan adina pli savens occurrenz che pon radunar umans giuvens che van mintgin sia atgna via (...). Quai collia la vita religiosa cun experiencias excepziunalas ch'interrumpan il mintgadi e pussibiliteschian da sa realisar sez (...). Empè d'ina religiu per mintga di crescha pia ina religiu da 'temps intensivs', (...) lieus solens e spazis variabls (...). La religiusadad pelegrina, basada sin la movibladad ed il traffic, (...) correspunda al sragischament da la persuna, liberada – almain formalmain – dal burdi da las appartegnientschas localas, famigliaras, religiusas, professiunalas e schizunt nazionalas (...). Il cartent d'oz (...) vul il dretg da tscherner sez sia cuminanza (...). Mintgin pretenda da sviluppar sia atgna vardad religiosa, sa basond sin atgnas experiencias» (pp. 280–283). L'autura punctuescha che laics e futurs spirituals d'oz giustificheschan lur engaschi aifer la baselia catolica en num da lur atgna realisaziun persunala.

Ins n'enclegia betg pli l'instituziun

Centrala resta tuttina la dumonda dal clerus catolic en Frantscha: «Dapi onns

fa la Conferenza episcopala quitads per vi da la mancanza da vocaziuns, la vegliadetgna adina pli auta dals spirituals e la difficultad da gulivar las forzas disponiblas sin il territori (...). Il clerus mora vairamain or» (p. 301). Cun questa constataziun èn colliads problems ch'ins enconuscha bain avunda era tar nus: «En la cultura e societad [franzosa] n'han ins anc ditg betg fatg svanir l'inegualitad tranter umens e femnas, ma lezza resguard'ins sco adina pli intolerabla (...). Ins reproscha a la Baselia [catolica] d'attribuir in plaz subordinà a la dunna tar la distribuziun da las incumbenzas religiusas» (p. 308). Co vegn questa critica formulada? «Ins manegia pli u main avertamain che la baselia sa marginaliseschia sez en la vita culturala e sociala e ch'ella haja pli gugent, sco ch'ina persuna dumandada ha declerà, 'da murir ora che da midar sias disas e guardar il mund sco ch'el è'. La medema remartga, ma generalmain pli vigurusa, fan ins areguard l'access dals umens maridads a l'ordinaziun sacerdotala (...). La blera glied na po simplamain betg chapir la tenuta correspondentia [da la Baselia catolica] (...). La difficultad principala da questa, en la societad franzosa d'oz, è insumma ch'ins na la chapescha betg pli» (pp. 308–310).

Sa pinar da maridar

Ina nota da la teologia catolica visavi quellas da tschellas baselgias, da l'islam e dal giudaism è ch'ella enclegia la lètg sco in'uniun sacramental ch'ins na possa tuttina betg stgassar cun in divorzi. Quai dat tant pli pais a l'ensinada avant in sacerdot catolic: «En lez

reguard crescha plitost la dumonda. La pressa catolica è adina puspè intgantada: 'L'ensinada progredescha puspè!' (...). Ma la baselia sto a medem temp far frunt ad aspectativas che derivan da la religiu moderna da l'amur pli (...) che da la mistica cristiana dal liom coniugal (...). Il spiritual sto chattar in cumpromiss che domaduas parts possian acceptar» (p. 211). Quai piglian ils uestgts franzos fitg serius. 2002 hani publictà in text davart la lètg. «Sia vart la pli interessanta è il pais fitg grond ch'el metta sin la preparaziun per lez sacrament. Questa duai esser 'seriusa, sche pussaivel cuminaivla [pia cun omadus spus ensemen, G. S.-C.] e durar 'l'onn avant l'ensinada' (...). Quai na dat betg be perditga dal quità da la baselia per 'dar in senn' a l'administraziun dal sacrament, mabain era da la necessitad da resguardar il fatg che lez senn religius è plitost ester per las pliras persunas pertutgadas e che la baselia ha perquai duì pretender lezza preparaziun» (pp. 316–318). Problems datti tar l'organisaziun da l'ensinada areguard ils texts prelegids e las chanzuns chantadas. Igl è success ch'el sacerdot ha stuì tractar ditg cun ils spus per als persvader da renunziar a lur giavisch «che lur anels vegnian beneditgs sin in tablet tegnì [dal gnif] da lur chaun uschè attaschà» (p. 322). Tut quai dat in'idea dals problems che la Baselia catolica en Frantscha sto schliar per vegnir enclètga en noss 21avel tschientaner.

* Danièle Hervieu-Léger, *Catholicisme, la fin d'un monde. Paris (Bayard, ISBN 2-227-31707-8) 2003.*